

671.1
078
3

畿輔通志

第壹函

畿輔通志卷二

帝制紀二

詔諭二

康熙六十一年十二月

諭戶部

皇考御極六十餘年澤周兆姓恩洽人心凡

巡幸所經州縣小民無不除道清塵趨事恐後古北口一路爲我

皇考每年

行幸之地農工商賈皆得瞻仰

天顏親承膏澤今聞

皇考賓天民心不知如何悲痛此路百姓歷年出力實堪憐憫今將
宛平順義懷柔密雲平谷五縣昌平一州雍正元年應徵正項錢

糧一萬四千三百八十兩零盡行蠲免又

陵寢一路此時正當修道之際亦宜軫恤今將大興三河二縣通州薊州遵化州三州雍正元年應徵正項錢糧一萬三千三百七十六兩零亦盡行蠲免爾部行文該撫徧飭所屬州縣實心奉行務令小民均霑實惠倘有不肖有司私行徵收澤不下究事覺定行重處爾部卽遵諭行

雍正元年正月署直隸巡撫趙之垣題請領賣通倉變色米石戶部議覆准行奉

上諭此案係朕親率爾等辦理之事

皇考因直隸各州縣內有米穀短少之處將通倉變色米石糶賣於民有益並非勒令每處著落糶賣若干不但水次遙遠之州縣雖近水次之地若於民無益亦不勒令糶賣今趙之垣不能領會

皇考原降諭旨之意以二百里以內附近水次之州縣派定數目糶賣具奏如此不但無益且又多此一事戶部卽照趙之垣所議准行甚謬此案無庸另批著曉諭趙之垣將此項變色米石於米穀短少之州縣領去糶賣若於民有益卽行領賣若領運繁難無有益處卽行停止如民間有因米穀短少情願赴通糶買此項米石自行運回者亦聽其買去

雍正元年正月

諭署直隸巡撫趙之垣河南巡撫楊宗義朝廷設官置吏原以養民遇有災荒卽多方撫恤方不負委任之重今據山東巡撫黃炳奏稱直隸河南鄰境小民資生無策間有攜家就近覓食者朕覽奏惻然當此春初農事方興若任其流離則小民何所依歸著卽遴選賢員招輯復業核實賑濟務令得所勿失農事以副朕惠養元

元之至意

雍正元年正月

諭九卿朕受

皇考付託之重撫育羣黎夙夜孜孜惟恐閭閻失所昨山東巡撫黃炳奏稱東兗二屬上年二麥失收小民未免困苦直隸河南鄰境之民有攜家覓食者朕卽飭諭直隸河南巡撫加意撫綏招輯復業但兩省巡撫竝未奏聞朕恐其視爲泛常奉行不力爾等可會同確議或特遣大臣或交與該撫作何賑濟安輯之法務使窮黎得霑實惠又前歲河南黃水潰決泛溢於直隸地方比年以來兩省近水居民耕種無資衣食匱乏均應加恩撫恤爾等一併議奏

雍正元年二月

諭戶部治天下要道莫過安民朕纘承大統以來軫念蒼生痼瘼時

切直隸山東河南連年歉收朕特降諭旨緩徵遣官賑濟每歲京師五城設立粥廠自十月初一日起至三月二十日止交五城御史煮粥賑饑今尙在青黃不接之時著展期一月煮粥散賑至四月二十日止但就食之民來京者多每日各增加銀米一倍務使得霑實惠以副朕憫念窮民至意

雍正元年五月

諭直隸巡撫李維鈞據奏直隸虧空請計州縣官歲入所餘積累填補州縣官令少從容不慮窘乏方可責其盡心撫字少有餘貲亦可自爲地方興利之舉何可勒令爲他人補苴虧缺耶

雍正元年五月

諭禮部近日天時頗旱

皇考先年屢降

諭旨云大喪之後必有旱年

太皇太后

世祖章皇帝

皇太后皇后之事俱曾經過朕當此之際嘗恐懼於懷而未置也三月十二日雨雖霑足朕曾兩三次以儆惕之意曉諭眾人三月以來多風不雨遂覺旱乾再直隸山東山西河南地方連年雨水不調田禾歉收朕雖遣大臣官員賑救當此旱時民必皇皇朕心甚以爲慮朕在宮中久已盡心虔誠祈禱爾部亦虔誠祈禱諸大臣各敬謹齋戒

雍正元年五月

諭大學士等山西平定州等處山多田少粒食恒艱小民向賴陶冶器具輸運直省易米以供朝夕近聞直隸州縣因米貴禁糶此方

百姓何以仰給昔春秋時諸侯各君其國尙申遏糴之禁今天下
一家海內之民皆吾赤子自宜緩急共濟現今陝西督臣運米萬
石賑救山西甚愜朕意豈有坐視鄰封乏食反行遏糴之理自今
凡鄰封郡邑偶遇荒歉卽相拯恤毋得各分疆界漠不相關其所
當禁者富戶規利販米動盈千萬又沿海數省運米出洋玩法網
利該督撫提鎮當嚴查禁止至肩負小民貿易度日悉從自便可
也著直隸巡撫曉諭鄰近平定州等處州縣不得禁糶以副朕一
視同仁之意并諭直省各督撫知之

雍正元年六月

諭直隸巡撫李維鈞畿甸之內旗民雜處向日所在旗人暴橫小民
受累地方官雖知之莫敢誰何朕所稔悉爾當奮勉整飭不必避
忌旗漢冰炭之形迹不可畏懼王公勳戚之評論卽皇莊內有擾

害地方者毋得姑容皆密奏以聞

雍正元年六月

諭戶部各倉監督向有年限滿漢一同更換立法最善前任若有未清後任豈肯接受所以稽錢糧之出入而除虧空之弊端也惟通州坐糧廳儲有通濟庫每年動用輕齎等項司其出入關係錢糧數十萬兩而坐糧廳一差並無年限或滿員陞轉則更滿員或漢員陞轉則更漢員滿漢參差更換彼此牽制回護勢難徹底澄清況在任日久倘有虧欠必至積累增多更難清理爾部可將通濟庫錢糧逐一確查務期明晰其坐糧廳一差嗣後或限二年或限三年滿漢一同更換庶接受之際不至含糊而弊端亦自此清釐爾部卽確議具奏

雍正元年六月

諭朕去年親閱京通各倉雖有積貯但京師人民聚集食指浩繁米糧關係重大儲備不可不多查有漕各省惟湖廣江西產米最廣近年盛京年歲豐收米價亦賤此三處酌量動正項錢糧採買數十萬石僱募民船運送來京大有裨益著怡親王隆科多會同確查作何採買運送之處詳議具奏

雍正元年七月

諭禮部國家祀典必貴潔誠

先農壇每歲展祀爲親耕藉田之所最宜清肅舊制圍牆內有地一千七百畝以二百畝給壇戶種植五穀蔬菜以供祭祀餘一千五百畝每年交租銀三百兩以備修理聞康熙四十年間內務府撥給圍頭耕種粢盛蔬菜無所從出惟向市井採買殊非潔淨精誠之意今著圍頭清還地畝仍給太常寺壇戶耕種以供祭祀之

需餘地一千五百畝著將內外圍牆查明丈尺每種地十畝估計令其修牆若干務期加謹葺護毋致傾壞每年將滿漢太常寺少卿派出一員不時稽察庶壇壝清潔祀事更加虔謹矣

雍正元年七月

諭倉場侍郎糧運關係國儲必須進行無阻始得及早抵通自楊村至通州河道多有淤淺糧船起剝每至耽延以致回空凍阻并誤新漕著該督嚴飭坐糧廳查看河道有淤淺處作速挑濬深通毋使阻滯並知會天津總兵官用心催趕且天津一帶地方向有販賣私鹽等弊糧船不許停泊火速趲行直抵通州至抵通後速行起卸交倉毋得需索抑勒苦累軍丁朕去年親自閱倉知漕糧過壩一晝夜可五萬袋可見交卸甚易爾等加意督催務使空船早得回南新漕亦可無誤漕運一事朕親身閱歷悉洞知爾等偷

不盡心料理或因勒索致有遲延責無所諉

雍正元年十月

諭直隸巡撫李維鈞冬令之雪消蝗潤麥洵稱瑞應我君臣惟互相勸勉以恭迓

天庥不因瑞雪及時遂爾逸豫怠忽則一誠上格自必永承彼蒼之垂佑耳

雍正元年十月

諭兵部驛站關係重大經朕屢加嚴諭然其間積弊難以盡詰有在官之累有在民之累如直隸山西等省差徭更爲浩繁雖驛馬足數亦供應不敷乃內而兵部外而驛道於給發馬匹時官吏通情受賄往往所給浮於勘合之數且行李輜重皆令驛卒乘馬背負多至八九人不等所到州縣以見馬換馬向有舊例不敢詰問至

督撫提鎮差使經過之處更唯命是從嗣後照勘合之外有敢多給一夫一馬者許前途州縣卽據實揭報都察院以聽糾叅如甲縣容情不揭而被乙縣揭報者並甲縣一併治罪其督撫提鎮騷擾驛遞者皆照此例庶少甦在官之累至若河南山東諸省離京稍遠謂耳目易欺每驛額設馬匹不過十存三四其草料工食等項仍照舊開銷且逐年詳報倒斃侵蝕補買之價差使一至則照里科派將民間耕種牲口強遣當差令其自備物料跟隨守候種種累民尤屬不法卽著該地方督撫將所有驛站逐一徹底清查缺額者勒限補買至派借民間牲口尤當勒石永禁違者卽從重治罪

雍正元年十月

諭內務府直隸省州縣亦可與爾衙門文移往來如莊頭人等有在

州縣地方生事者著該州縣官員竟行呈報爾衙門爾等查問訓飭若不悛改卽行斥革著行文直隸巡撫凡有皇莊州縣地方通行曉諭至各莊頭交糧時須逐一查問將生事之人嚴加訓飭不肯悛改者卽行斥革

雍正二年二月

諭直省督撫朕惟四民以士爲首農次之工商其下也漢有力田孝弟之科而市井子孫不得仕宦重農抑末之意庶爲近古今士子讀書砥行學成用世國家榮之以爵祿而農民勤勞作苦手胼足胝以供租賦養父母育妻子其敦龐淳樸之行豈惟工賈不逮亦非不肖士人之所能及雖寵榮非其所慕而獎賞要當有加其令州縣有司擇老農之勤勞儉樸身無過舉者歲舉一人給以八品頂帶榮身以示鼓勵

雍正二年閏四月

諭直隸總督巡撫社倉之設原以備荒歉不時之需用意良厚然往往行之不善致滋煩擾官民俱受其累朕意以爲奉行之道宜緩不宜急宜勸諭百姓聽其自爲之而不當以官法繩之也近聞各省漸行社倉之法貯蓄於豐年取資於儉歲俾民食有賴而荒歉無憂朕心甚爲嘉悅但因地制宜須從民便是在有司善爲倡導於前留心稽核於後使地方有社倉之益而無社倉之害此則爾督撫所當加意體察者也又聞民間輸納錢糧自封投櫃亦屬便民之法但偶有短少之處令其添補每至多方需索其數浮於所少之外理應將原銀發還仍於原封內照數補足交納庶可免多索之弊此雖細事督撫大吏亦不可不留心體察嚴飭有司以除民累

雍正二年閏四月

諭順天府尹京師廣甯門外向有普濟堂凡老疾無依之人每棲息於此司其事者樂善不倦殊爲可嘉

聖祖仁皇帝曾賜額立碑以旌好義爾等均有地方之責宜時加獎勵以鼓舞之但年力尙壯及游手好閒之人不得借名混入其中以長浮惰而生事端又聞廣渠門內有育嬰堂一區凡孩穉之不能養育者收留於此數十年來成立者頗眾夫養少存孤載於月令與扶衰恤老同一善舉爲世俗之所難朕心嘉悅特頒匾額并賜白金爾等其宜示朕懷並倡率資助使之益加鼓勵再行文各省督撫轉飭有司勸募好善之人於通都大邑人煙稠集之處若可以照京師例推而行之其於字弱恤孤之道似有裨益而凡人忱惕惻隱之心亦可感發而興起也

雍正二年閏四月

諭漕運總督及直隸山東河南巡撫各省旗丁運糧進京沿途水次理應奉公守法乃數年前浙江湖廣糧船因懷挾私忿彼此爭鬪持戈放箭殺傷者多逞其兇頑肆行無忌又聞前歲之冬糧船守東在山東地方竟行搶奪擾害居民去歲回空又聞強取百姓衣物此等皆大干法紀嗣後總漕若不嚴加約束禁止妄行仍然寬縱直隸山東河南巡撫卽著轉飭沿河官弁不時稽察倘犯法爲非卽分別輕重按律治罪不得稍有徇縱推諉以長刁風若有如從前爭鬪傷人及搶奪擾民之事該督撫卽行奏聞請旨於彼地方立刻正法決不寬貸可預行曉諭各省運丁知之

雍正二年十月

諭戶部直隸九府今秋歲登大有惟霸州東安大城武清玉田寶坻